

BERITA HARIAN

SINGAPURA, MS 1

JUMAAT, 4 JUN, 2010

SINGAPURA Sukatan baru Bahasa Melayu bagi sekolah menengah pula Pelajar akan lebih didedahkan kepada aspek pendengaran dan pertuturan Oleh Nur'adilah Mahbob adilaham@sph.com.sg

SUKATAN baru bagi mata pelajaran Bahasa Melayu di peringkat sekolah menengah akan dilaksanakan Januari tahun depan.

Menerusi kurikulum baru yang akan diperkenalkan itu, para pelajar akan lebih didedahkan kepada aspek pendengaran dan pertuturan.

Usaha ini dirasakan akan lebih membantu dalam 'melenturkan' lidah para pelajar agar mereka lebih fasih bertutur dalam bahasa ibunda.

Mendedahkan hal ini di Seminar Bahasa Melayu 2010 semalam, Penolong Pengarah Bahasa Ibunda, Bahagian Perancangan dan Pembangunan Kurikulum, Kementerian Pendidikan (MOE), Encik Mohd Noh Daipi, berkata sukatan baru bagi peringkat menengah diperkenalkan setelah pihaknya selesai menjalankan semakan ke atas sukatan pelajaran Bahasa Melayu bagi peringkat sekolah rendah yang mula dilaksanakan pada 2008.

'Menerusi sukatan pelajaran yang baru ini kami akan menggalakkan pelajar menguasai lebih banyak lagi kemahiran menyentuh aspek mendengar dan bertutur.

'Kami juga akan memastikan lebih banyak bahan teknologi maklumat (IT) digunakan,' kata Encik Mohd Noh, yang juga Pengarah Pusat Bahasa Melayu Singapura.

Menurut beliau, perincian lanjut mengenai sukatan baru bagi peringkat menengah akan disebarkan kepada guru-guru pada tarikh kemudian.

Kenyataan Encik Mohd Noh



SERONOK BERANIMASI: Para pelajar Sekolah Rendah Fuhua menerangkan kepada Encik Hawazi bagaimana ICT diterapkan dalam pembelajaran Bahasa Melayu dengan cara menarik menerusi ProgramAnimasi. -- Foto JOHARI RAHMAT

itu juga sejajar dengan tujuan utama Seminar Bahasa Melayu 2010 untuk memperluas ilmu dan keterampilan guru-guru Bahasa Melayu dalam menerapkan Teknologi Perhubungan dan Maklumat (ICT) serta membentuk penilaian alternatif.

Sesi yang berlangsung di Auditorium Maktab Rendah Anglo Chinese dekat Clementi itu dihadiri 348 peserta, termasuk para guru sekolah rendah, menengah, serta maktab rendah.

Sementara itu, tetamu terhormat seminar tersebut, Setiausaha Parlimen Kanan (Tenaga Manusia merangkap Kesihatan) Encik Hawazi Daipi, dalam ucapannya telah menekankan jaminan pemerintah bahawa dasar dwibahasa di sini tidak akan berubah, para guru kini boleh menumpu perhatian kepada usaha meningkatkan profesionalisme dan mutu

pengajaran dan pembelajaran di bilik darjah, termasuk penggunaan ICT.

Mengenai maklum balas yang disuarakan sesetengah anggota masyarakat Melayu terhadap kedudukan bahasa ibunda, Encik Hawazi berkata:

'Komen-komen yang diberikan mencerminkan masyarakat Melayu Singapura terus prihatin akan kedudukan dan kepentingan bahasa Melayu di Singapura.'

Di seminar itu juga para guru berpeluang berkongsi amalan baik, cara dan strategi yang inovatif dalam memanfaatkan ICT dalam pembelajaran bahasa Melayu.

Antara mereka yang mengongsi pengalaman adalah guru-guru dari Sekolah Rendah Endeavour – Cikgu Noor Azleen Sarbini, 32 tahun, dan Cikgu Suriani Abdul Bakri, 37 tahun yang menggunakan alat MP3,

suatu format audio digital, bagi menilai kemahiran lisan.

'Dengan menggunakan alat MP3, murid-murid dapat merakam bacaan mereka sendiri. Rakaman yang diputarkan kembali itu kemudian dinilai oleh rakanrakan sedarjah,' jelas Cikgu Suriani.

Cikgu Muliana Mohammad, 32 tahun, dari Sekolah Rendah Jiemin pula berkata, alat berbilang media seperti VoiceThread membolehkan murid memberi komentar dengan menggunakan mikrofon, menaip atau melalui 'webcam'.

'Apa yang unik dengan alat ini adalah ia boleh dijalankan secara serentak - lantas guru dapat menjimatkan masa dalam menilai murid,' katanya lagi.